



UKA16/49

12. oktober 2016

Aqqaluaq B. Egede

**Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalackersuisut UPA 17-mut saqqummiunneqartussamik periusissiamik suliaqarnissaminnut peqquneqarnissaannut Inatsisartut aalajangiiffigisassaattut siunnersuut,**

(Inatsisartunut ilaasortat: Kalistat Lund aamma Mute Bourup Egede, Inuit Ataqatigiit)

Nunagisami atugassarititaasut nunap inuunik periarfissiissapput. Namminersorneq tassaavoq innuttaasut namminneq qinigaat, taamaattumik inuiaqatigiit namminersortut aqqissuunniaraanni pisariaqarpoq inuiaqatigiit anguniagassamittut saqqummiussaata tunngavigalugit ingerlatsinissaq. Matumani siunnersuuteqartut anguniagaat qulequtaq namminersorneq pillugu isumalioqatigiissitap isummerfigineqartariaqartut tikkuarsimasaannut naleqquttuuvoq. Namminersorneq Pillugu Isumalioqatigiissitaq isummerfissanik imaattunik inassuteqaateqarsimavoq: -

1. Suliffeqarnermi ineriartorneq inuiaqatigiinnit tamanit qanimut malinnaaffigineqartariaqartoq.
2. Kikkut sulisussanik pisariaqartitsisuusut naleqqussarfigineqassaasut
3. Nunap inuunik sulisoriniakkat qanoq ilinniartitaallutik qaffassarneqarnissaat pilersaarusiorneqassasoq
4. Sulisitsisup sulisartullu akornanni atugassarititaasut nunap inuisa pisinnaasaannut naleqqussarlugit sulisartoqarnikkut aqqissuussinissaq.

Namminersorneq pillugu isumalioqatigiissitat isumaqarput nunap inuunik isumalluutit pitsaanerpaamik iluaqutiginiarnissaasa qulakkeernissaannut sakkussaalluortoq qinikkat aalajangiisartullu allat suliffeqarnermi maannakkut siunissamilu piumasaqaataasussanut naalackersuinikkut sulisoqartariaqartoq. Tamannalu suliaq ingerlassasoq inuiaat malinnaatinnerisigut suleqataatinnerisigullu.

Iliuseqartariaqarpugut nunatsinni nunattalu avataani niuernikkut tunisassiornikkullu suliffissaqartitsinikkut pissutsit akuleruffiginerullugit malinnaanerulernissarput angutserlugu, aamma pisortat suliffeqarfiini inuiaqatigiittut akisussaaffinnik tigusinissatsinnut naalackersuinikkut pilersaarusiortoqarnissaa pingaaruteqarluinnartoq naluneqanngilaq. Taamaammat Naalackersuisut akissuteqaamminni suliassap tamatuma ingerlareerneranik oqaaseqarnerat pillugu Inuit Ataqatigiinniit kissaatigaarput suliaq ingerlasoq pingaaruteqarmat killiffissiorlugu Inatsisartut saqqummiivigineqassasut. Suliaq ingerlasimappat eqqumeeqaaq ukiut qulit ingerlaneranni angujartuaarneqartussatut siunnersuut itigartinneqarsinnaappat.

# INUIT ATAQATIGIIT

## INATSISARTUNI



Taava sooq siunnersuut itigartinneqassava? Imaappa ukiut qulit qaangiutsinnagit siunertaq atuutilertussatut naalackersuisuniit naatsorsuutigineqarmat? Taamaassimangippat itigartitsinermut tunngavik eqqumiissaqimmat.

Naalackersuisut itigartitsinerminnut tunngavilersuutigisaannut ilaavoq misissuineq suliareqqammigartik qujanartumik takutitseqqammertoq pisortat allaffissornikkut ingerlatsiviini danskit nunanilu allamiut allat sulisuusartut ukiuni kingullerni ikileriarsimasut, aammalu suli amerlaneruleralluttuinnartut nunatsinni inunngorsimsut pisortani suliffissani sivisunerusumik ilinniarsimanissamik piumasaqaateqarfiusuni suliffeqalartatut. Inuit Ataqatigiit kissaatigaarput Naalackersuisut misissuinermi nalunaarusiaq Inatsisartunut saqqummiutissagaat.

Inuit Ataqatigiit pingaarteqaarput nuna inuminit aqunneqartoq namminersortorlu aamma namminersorneq pillugu pisussaaffiusut kaammattuutigineqartullub tamaasa naapertorlugit siuarsaasoqarnissaa. Massakkut aalajangersagaqanngilagut, inatsisunik malitassaqaqanngilagut, aamma atorfinitsitsinermik politikkeqanngilagut nunatsinni pisortat suliffeqarfiini atorfinitsitsinermi oqaatsitigut, kulturikkut naleqartitatigut allatigulluunniit qanoq ingerlatsiumanerluta.

Akerlerluinnaanik isiginnaarpagut aamma inuit oqallittarfiisigut arajutsisimangilarput nunatta avataani pisortani atorfissarsiortoqartartoq nunatsinni saqqummiunneqanngitsuni. Allaat erseqqivissumik nunatsinni inuit inorsillugit qinnuteqartitsinermi piumasaqaasersuisarnerit saqqummiunneqartatut takusarpagut. Allatut oqaatigalugu ullumikkutut ingerlaannarnissatsinnut periarfissaanngilaq. Allannortoqartariaqarpoq. Allannortoqassappat aamma maani inersuarmi inatsisiliortut Naalackersuisullu allannguinnissamut piumassuseqartariaqarpugut.

Taamatut oqaaseqarluta siunnersuut Inatsisartut Inuussutissarsiornermut ataatsimiititaliaanni suliarineqartussanngortinnissaa Inuit Ataqatigiinniit inassutigaarput.